

ԿՐՕՆԱ-ԻՄԱՍՏԱՍԻՐԱԿԱՆ

ԳԵՈՐԳ ՅԱԿՈԲԵԱՆ

ԵՊՀ Փիլիսոփայության և հոգեբանության
Ֆակուլտետի տեսական փիլիսոփայության
և տրամաբանության ամբիոնի ասպիրանտ

ԿՐՕՆԻ ԵՒ ԳԻՏՈՒԹԵԱՆ ՀԱԿԱՄԱՐՏՈՒԹԵԱՆ ՀԻՄՆԱԽՆԴՐԻ ՇՈՒՐՋ

Քանալի բառեր. կրօն, գիտություն, հակամարտություն, բախում, լեգիտիմություն:

Keywords: religion, science, conflict, clash, legitimacy.

Հոգեւոր մշակութային բոլոր ձեւերը սերտ կապի մէջ են գտնուում միմեանց հետ: Այս կապը կարող է արտայայտուել փոխադարձ կամ միակողմանի տարատեսակ ազդեցությունների ձեւերով. փոխլրացչություն՝ փաստարկման գործընթացում, հակամարտություն՝ հերքում կամ նսեմացում, սահմանների ճշգրտում, և այլն:

Այս իրողություններից հասարակական և քաղաքական ոլորտներում ամենասուրն արտայայտուել են մշակույթի բոլոր ձեւերի փոխազդեցությունները կրօնի հետ. դրանք առկա են եղել անյիշելի ժամանակներից, առկա են և արդի աշխարհում. փոխադարձաբար միմեանցից օգտուում կամ միմեանց վրայ են հարձակուում (ի դէմս մշակութային տուեալ ձեւի ներկայացուցիչ-գործորդների) արուեստը և կրօնը, գեղարուեստական գրականությունը և կրօնը, փիլիսոփայությունը և կրօնը, և այլն:

Կրօնի¹ հետ ամենայաճախ «բախուող» հոգեւոր մշակութային ձեւը գիտությունն է: Այս բախումը եղել և մնում է խիստ վտանգաւոր. սրա հետեւանքով (և ընթացքում) խանգարում է գիտութեան զարգացման բնականոն ընթացքը, խաթարում է կրօնի մի շարք գործառնությունների իրացումը, իսկ հասարակական մակարդակում՝ բախման հանրայնացման պայմաններում, տեղի են ունենում հասարակական «սալւարդներ (trauma)», այսինքն (ի թիւս այլնի)՝ անվստահութեան յայտանիշ, մեղքի ու ամօթի խմբային զգացում, ինքնութեան ու լեգիտիմութեան ճգնաժամ, և այլն²: Մատնանշուած խնդրի սրությունն աւելի ակնյայտ է դառնում, երբ հաշուի ենք առնում, որ համաշխարհային ԶԼՄ-ները լեցուն են կրօնա-աստուածաբանական բանավէճերով, որոնք հանդիսատեսների մօտ առաջացնում են ծայրայեղ հիասթափություններ, ագրեսիաներ, տագնապներ, կեանքի իմաստի կորուստ, և այլն: Ուստի սոյն խնդիրը, լինելով զուտ տեսական, գործնականում վերաճում է հակամարտությունների և պատերազմների:

Այսպիսով, խնդրի օրակարգայնությունն ակնյայտ է. վերը յիշատակուած հասարակական և անձնային վնասները հնարաւորինս չէզոքացնելը ու նոր վնասները կանխելը ենթադրում է խնդրի, առնուազն, տեսական լուծում: Իսկ լուծումը

¹ Մեր համոզմամբ, ճշգրիտ իմաստով՝ կրօն կարող են համարուել միայն Մովսիսականութիւնը, Քրիստոնէութիւնը և Իսլամը: Հոգեւոր մշակոյթի միւս այն ձեւերը, որոնք ընդունուած է համարել կրօն, կարծում ենք, չեն բաւարարում կրօն հայեցակարգի պահանջները, ուստի դրանք հաւատալիքների համակարգեր են, բայց ոչ կրօններ:

² Տե՛ս, Штомпка П., Социальное Изменение Как Травма, Теория. Методология (Статья Первая) 2001г., էջ 11:

ենթադրում է բախման կամ, ընդհանրապես, հակամարտության պատճառահետեւանքային կապերի, պայմանների և առիթների վերհանում: Սակայն հարցն այն չէ, թե՞ պատմական ի՞նչ իրադարձությունների արդյունքում և պայմանների համընկնությունեամբ են բախում կրօնն ու գիտությունը, այլ այն, թե՞ որքանով է լեգիտիմ՝ բանականօրէն հիմնաւորելի և արդարացիելի, կրօնի և գիտութեան հակամարտութիւնը (բախումը), եթէ այն ընդհանրապէս լեգիտիմ է: Այսինքն՝ հարկաւոր է պարզել, արդեօք այս հակամարտութիւնն անհրաժեշտաբար բխում է կրօնի և գիտութեան էական յատկանիշներից, թե՞ դրանց անհարկի վերագրւում են այնպիսի յատկանիշներ, որոնց միջոցով արհեստականօրէն կազմակերպւում է հակամարտութիւնը: Այսպիսի յատկանիշների առկայութեան դէպքում, կրօն-գիտութիւն հակամարտութիւնը կարելի կը լինի համարել լեգիտիմ, և ներկայումս լայն արծարծւում ունեցող խնդիրը՝ կրօնը ճշմարտութիւն է հրամցնում, իսկ՝ գիտութիւնը կեղծիք (և հակառակը), վաւերական քաղաքացիութիւն կը ստանայ մտքի պատմութեան շրջանակներում: Իսկ եթէ պարզուի, որ կրօն-գիտութիւն հակամարտութիւնը լեգիտիմ չէ, ապա այս հակամարտութիւնից արտածվողոց ցանկացած այլ խնդիր անհրաժեշտաբար պէտք է յայտարարուի՝ կեղծ:

Ե՛ւ «կրօն»³, և՛ «գիտութիւն» հասկացութիւնները ժամանակի մէջ ենթարկուել են մեծ փոփոխութիւնների: Սրանցից և ոչ մէկն իր ծագման սկզբնական շրջանում չի կիրառուել այն իմաստով, որով կիրառւում է ներկայում. ո՛չ Հին, ո՛չ Նոր Կտակարաններում և ո՛չ էլ Ղուրանում ու հադիթներում⁴ չի օգտագործւում «կրօն» հասկացութիւնը: Մովսիսականութեան և / կամ Յուդայականութեան շրջանակներում «կրօն»-ի փոխարէն կիրառւում է «հալախահ (הֲלָכָה-halakhah)» հայեցակէտը, որը սկզբնական շրջանում առաւելապէս նշանակում էր ինչ-որ բան անելու ճշմարիտ ճանապարհ. մի հայեցակէտ, որ Աստուածաշնչի հայերէն (գրաբար և աշխարհաբար) տեքստ է փոխանցուել «նաւապահ» հասկացութեամբ. «...ցուցցես դոցա նաւապահս յորս գնայցեն, և զգործս զոր գործիցեն» (Ելք ԺԷ:20)⁵: Յետագայում այս «հալախահ»-ը կիրառուեց «...յուդայականութեան ամբողջ համակարգի վերաբերեալ»⁶:

Նորկտակարանեան (գրաբար և աշխարհաբար) հայերէն տեքստերում հանդիպող «կրօն» բառը հին յունարէն բնագրերում, որպէս այդպիսին, բացակայում է: Բնագրում կիրառւում է «թեսկեյա (θησκεία - threskeia)»⁷ հասկացութիւնը, որը հայալեզու տեքստ է փոխանցւում «կրօն», «պաշտամունք», և այլ նմանատիպ հասկացութիւններով. «...զի ըստ նշմարտագոյն կրօնից օրինացն մերոց կեցեալ եմ փարիսեցի» (Գործք ԻԶ:5), «Մի՛ ոք զձեզ խաբեցէ, որ կամիցի խոնարհութեամբ և կրօնիմ հրեշտակաց...» (Կողոս. Բ:18): Աշխարհաբար տեքստում այս «կրօնիմ» բառը փոխարինուած է «պաշտամունք»-ով: Դրութիւնը գրեթէ նոյնն է Յակոբոս Առաքեալի թղթի ներքոյիշեալ երկու դէպքերում էլ, որտեղ գրաբարեան «կրօնաւորութիւն» բառը փոխարինուած է աշխարհաբար «բարեպաշտ»-ով. «Եթէ ոք կամիցի կրօնաւոր լինել, և ո՛չ սանձահարեցէ զլեզու իւր, այլ զբաղեցուցանիցէ զսիրտն իւր, այնպիսոյն վայրապա՛ր է կրօնաւորութիւնն:

³ Խորապէս գիտակցելով միջեկեղեցական մի շարք տարբերութիւններ՝ սոյն յօդուածում ձեռնպահ եմք մնում վկայակոչելու Հայ Առաքելական Սուրբ Եկեղեցու վարդապետութիւնը՝ բացառութեամբ մի քանի դրոյքների, որոնք, ինչ թէ շատ, ընդհանուր են աւանդական միւս եկեղեցիների համար նոյնպէս:

⁴ «Հադիթն (حديث)» բառը, արաբերէնից թարգմանաբար, նշանակում է «նորութիւն, գեկոյց, տեղեկութիւն»: Իսլամական «Սուննան»-ը բաղկացած է հադիթներից, որոնք տեղեկութիւններ են հաղորդում Մուհամեդի և իր զինակիցների վարմունքների վերաբերեալ: «Սուննան»-ը, Դուրանի կողմից, մուսուլմանների աւանդական գործունէութեան հիմունքի միւս «գիրքն» է: Այս մասին մանրամասն՝ տե՛ս, Karen Armstrong, Islam, A Short History, Modern Library Paperback Edition, 2002, էջ 49:

⁵ Տե՛ս, Աստուածաշունչ Մատեան Հին և Նոր Կտակարանաց, Կոստանդնուպոլիս, 1895: Աստուածաշունչ Մատեան Հին և Նոր Կտակարանաց, Վենէտիկ, 1085: Աստուածաշունչ Մատեան Հին և Նոր Կտակարանների, Մայր Աթոռ Ս. Էջմիածին, Հայաստանի Աստուածաշնչային Ընկերութիւն, 2010:

⁶ Jacobs Louis, Jewish Virtual Library, Encyclopedia Judaica: Halakhah, <http://www.jewishvirtuallibrary.org/halakhah>:

⁷ Տե՛ս, The Lexham English Bible English-Greek Reverse Interlinear New Testament. Copyright 2010 Logos Bible Software:

Կրօնաւորութիւն սո՛ւրբ և անաւատ՝ առ ի յԱստուծոյ և ի Հօրէ՛ ա՛յս է...» (Յկվբ. Ա:26-27):

Վերջապէս, Ղուրանը, որպէս «կրօն և կեանքի ու մահուան» հայեցակարգ, կիրառում է «դին (دين - din)» հասկացությունը⁸:

Արդի արեւմտեան աշխարհում լայնօրէն կիրառուող «ռելիգիոն (religion)» հայեցակարգը իր ներկայիս իմաստը ձեռք է բերել է. Բ. Թեյլորի մարդաբանական աշխատութիւնների լոյս ընծայմամբ. վերջինս «...համակարգայնօրէն կիրառեց այս տերմինը աշխարհի բոլոր կրօնների վերաբերեալ»⁹: Մինչ այդ, Կաթոլիկ եկեղեցու հզօր գործիչների (Լակտանտիոս, Օգոստինոս, Աքվինացի, և այլք) ազդեցութեան ներքոյ, Կիկերոնի աշխատութիւնների շնորհիւ լայն շրջանառութիւն ստացած, այս բառը համարուում էր «ֆրիստոնէութիւն» բառի համարժէքը¹⁰:

Բոլոր լեզուներում այս հասկացութիւնը ենթարկուել է իմաստային մի շարք փոփոխութիւնների, ուստի խնդրի յստակեցման համար հարկաւոր է վերլուծել և պարզաբանել, թէ ի՞նչ նշանակութիւն ունի «կրօն» հասկացութիւնը ոչ թէ հաւատացեալ անձի արժեհամակարգում, այլ գիտափիլիսոփայական-ակադեմիական շրջանակներում: Հաշուի առնելով այս իրողութիւնը՝ ստորեւ վեր է հանուում «կրօն» հայեցակարգի բաղկացուցիչ հիմնական տարրերը, որոնց վերլուծութիւնը առաւել բացորոշ կը դարձնի «կրօն»-ի էութիւնը. «կրօն»-ի բաղկացուցիչ հիմնական տարրերն են՝ մենիշխանութիւն, եզրոյթի մենաշնորհ, ջատագովութիւն, հաւատք, փրկչականութիւն, անվերապահ խոնարհութիւն առ կրօնական առաջնորդը, տեղիքի ճշմարտութեան վաւերականութիւն՝ անձնաւորման միջոցով, ժառանգորդութիւն, և այլն:

ա) **մենիշխանութիւն**. Մովսէսը, ի թիւս բազմաթիւ այլ վկայութիւնների, Աստուծոյ անունից պատուիրում է. «Եւ եմ Տէր Աստուած քո որ հանի զեզ յերկրէն եգիպտացոց ի տանէ ծառայութեան: Մի՛ եղիցին քեզ այլ աստուածք բաց յինէն: Մի՛ արասցես դու քեզ կուտս ըստ ամենայն նմանութեան. որ ինչ յերկինս ի վեր, եւ որ ինչ յերկիր ի խոնարհ, եւ որ ինչ ի ջուրս ի ներքոյ երկրի: Մի՛ երկրպագանիցես նոցա, եւ մի՛ պաշտեսցես զնոսա. զի ես եմ Տէր Աստուած քո՝ Աստուած **նախանձոտ**» (Ելից Ի:2-5), (բնագրային մէջբերումներում առկայ ընգծումները մերն են - Գ. Յակոբեան)... Այլեւ. «Լո՛ւր Իսրայէլ, տէր Աստուած մեր՝ **Տէր մի է**: Սիրեսցես զտէր Աստուած քո յամենայն սրտէ քոմմէ, եւ յամենայն անձէ քոմմէ, եւ յամենայնէ զատրութենէ քոմմէ եւ յամենայն մտաց քոց» (Երկ. Աւրինաց Զ:4-5): Ե՛ւ Քրիստոնէութիւնը, և Իսլամը, հենուած լինելով, նաեւ Հին Կտակարանի վրայ, լիարժէքօրէն ընդունում են մէջբերուած պատուիրանները, և այս մէջբերման վերջին նախադասութիւնը Տէր Յիսուսը յայտարարում է՝ որպէս «...մեծն եւ առաջին պատուիրան» (Ղուկ. ԻԲ:38):

Իսկ ինչ վերաբերում է Ղուրանին¹¹, ապա, կարելի է ասել, չկայ մի սուրահ, որում այս մասին պատուեր չտրուի, օրինակ. «Օ՛, մարդկութիւն, պաշտեցէ՛ք ձեր Տիրոջը, ով արարել է ձեզ...» (Սուր. 2:21), «Նրանից բացի, ուրիշ ոչ ոք չպիտի՝ պաշտուի...» (Սուր. 3:6), «Ասա՛ դու. «...ձեր Աստուածը մէկ Աստուած է...»» (Սուր. 54:6): Այս իրողութիւնը Իսլամում արտայայտուում է «թավհիդ (توحيد, tawhid) - Ալլահի մէկութիւնը խոստովանելու»¹² հայեցակարգով:

Այս պատուիրաններն իրականացնելը՝ բոլոր հաւատացեալներին «պարտաւորեցնում» է մարդկութեանը բաժանել երկու խմբի՝ նոյնակրօնների և մոլորեալ-

⁸ Տե՛ս, **Ramadan Tariq**, Islam: The Essentials, Penguin Random House UK, First published 2017, էջ 274:

⁹ **De Cruz, Helen**, "Religion and Science", The Stanford Encyclopedia of Philosophy (Spring 2017 Edition), First published Tue Jan 17, 2017, 1.2.

¹⁰ Տե՛ս, The Catholic Encyclopedia, article - "Religion", derivation, analysis, and definition, vhttp://www.newadvent.org/cathen/12738a.htm :

¹¹ **Quran**, english translation, modern english translated from arabic by Talal Itani, published by ClearQuran, Dallas, Beirut, www.ClearQuran.com .

¹² Хрестоматия по исламу, составитель и ответственный редактор **С. М. Прозоров**, М.: Наука, «Восточная литература», 1994, с. 207.

կործանողներին: Յանկացած իսկական հաւատացեալի համար բոլոր մարդիկ կ'ամ նոյնակրօն են, կ'ամ՝ աստուած հայհոյող. «...ն ամենայն ուր ոչ խնդրիցէ զՏէր Աստուած Իսրայէլի՝ մեռցի, յերիտասարդէ մինչեւ ի ծերն, և յառնէ մինչեւ ցկին» (Բ Մնաց. ԺԵ:13):

բ) **Եզրոյթի մենաշնորհում.** ոչ մի կրօն չի կարող հանդուրժել, որ օրինակ՝ Աստուած, սրբութիւն, աղանդ, ելն. հասկացութիւնների մասին դատողութիւններ կատարուեն, այլ մօտեցմամբ, քան իրենն է: Կրօնը չի հանդուրժի ոչ միայն այլ կրօնի մօտեցումները, այլ նաեւ՝ հոգեւոր մշակոյթի այլ տեսակի սուբյեկտի, ասենք, արուեստարարի կամ գիտնականի մօտեցումը, եթէ վերջիններս «համարձակուեն»՝ տուեալ կրօնի ընդունածից բացի, այլ կարծիքներ ունենալ. «...Աստուած՝ ոչ թէ գիտական, այլ կրօնական հասկացութիւն է. գիտութիւնը կարող է դրանով զբաղուել լոկ այնքանով, որքանով որ՝ այն գիտութիւն է կրօնի մասին»¹³:

գ) **Ջատագովութիւն.** բոլոր կրօնները, համոզուած լինելով, որ այլակրօնները կամ կործանուած են կամ կործանման եզրին, իսկ իրենց պատուիրուած է՝ շարունակել Փրկչի առաքելութիւնը, ձգտում են ցանկացած մարդու, ամէն գնով (յաճախ՝ կեանքի), դարձնել առ իրենց կրօնը:

Չնայեա՞ծ Հին Կտակարանում հանդիպում ենք մի քանի դէպքերի, երբ ոչ-հրեան՝ Յակոբ-Իսրայէլի ազգին չպատկանող անձը, ընդունում է Մովսիսականութիւն, սակայն այս կրօնում գլխաւորապէս խրախուսում ու հետեւողականօրէն իրականացւում է Յակոբի զաւակների սերունդների նկատմամբ իրականացուած կրօնական ջատագովութիւնը: Սա բնական է, որովհետեւ այստեղ գործում է «ընտրեալ ազգ» հայեցակարգը: Բայց սա բնաւ չի՝ խանգարում՝ համայն աշխարհում Տիրոջ ջատագովութիւնն անելուն. «Խոստովան եղերով Տեառն, եւ կարդացէ՛ք զանուն նորա, պատմեցէ՛ք զգործս նորա մեծամեծս, արհնեցէ՛ք զնա, եւ պատմեցէ՛ք ամենայն հեթանոսս զսքանչելիս զոր արար...» (Ա Մնաց. ԺԶ 8-9): Գալով կրկին Յակոբի սերունդներին՝ ասենք, որ ցանկացած հրեայ, ամէն պահի էլ, կարող էր «խտտորուել ուղիղ ճանապարհից», ուստի Հին Կտակարանում կարելի է հանդիպել կրօնական մի շարք բարենորոգումների. «Ղեւտացիք եւ ... քահանայք. եւ ուսուցանէին զՀուդա, եւ ընդ նոսա զգիրք օրինացն Տեառն, եւ անցանէին ընդ քաղաքսն Հուդայ, եւ ուսուցանիէին զժողովուրդն» (Բ Մնաց. ԺԵ:8-9):

Քրիստոնէութեան դէպքում, աշխարհն ունի գրական կոթողների մի հսկայ գանձարան, որը կոչւում է ջատագովական գրականութիւն: Եւ այս ջատագովութիւնն սկսում է հէնց Քրիստոնէութեան Հիմնադրից և իր բուռն ծաղկումն է ապրում առաքելական շրջանից սկսած. «Գնացէ՛ք այսուհետեւ՝ աշակերտեցէ՛ք զամենայն հեթանոսս. մկրտեցէ՛ք զնոսա յանուն Հաւր՝ եւ Որդոյ՝ եւ Հոգւոյն Սրբոյ: Ուսուցէ՛ք նոցա պահել՝ զամենայն՝ որ ինչ պատուիրեցի ձեզ» (Մաթ. ԻԸ:19-20):

Իսլամը նոյնպէս, սկսած իր հիմնադրով, ջատագովական է, և այս փաստը մէկ անգամ չէ, որ արձանագրուած է և՛ Ղուրանում ու Սուննայում, և՛ պատմա-ուսումնասիրական փաստաթղթերում. Մուհամեդը, թէեւ արդէն զառանցելով, սակայն նոյնիսկ մահուան պահին, «ջատագովեց». «Հեղձաձայն խօսելով չկապակցուած բառեր «ոչ բարձր - ընկերներ - դրախտում»¹⁴:

դ) **Հաւատք.** այս երեւոյթն այնքան սերտ է կապուած կրօնին, որ երբեմն նոյնացւում է կրօնի հետ: Չկայ «կրօն» հասկացութեան մի բացատրութիւն, որն այս կամ այն չափով կապ չնոյնանայ հաւատքի հետ: Եւ դա պատահական չէ. կարելի է ասել՝ և՛ ողջ Աստուածաշունչը, և՛ ողջ Ղուրանը, իրենց պատմութային կողմով, արձանագրում են հաւատի մասին նշանաւոր իրադարձութիւններ: Աբրահամը՝ Հաւատացյալների հայրը, ով վիթխարի կարեւորութիւն է ներկայացնում երեք կրօններում էլ, նախեւառաջ, հէնց հաւատով է, որ նշանաւորուում է. «Եւ հաւատաց Աբրահամ

¹³ Булгаков Сергей, “Свет не вечерний. Созерцания и умозрения”, Серия «Мыслители XX века», Москва, изд. «Республика», 1994, с. 25.

¹⁴ Соловьев Владимир, “Магомет. Его жизнь и религиозное учение”, Серия «Жизнь замечательных людей», 1896, с. 57.

Աստուծոյ, եւ համարեցաւ նմա յարդարութիւն» (Ծն. ԺԵ:6):

Հաւատ(ք) բառի բազմանշանակութիւնը պարտադրում է՝ որոշ ճշգրտումներ և իմաստի յստակ արձանագրում:

Պօղոս Առաքեալը սահմանում է հաւատք հասկացութիւնը. «Զի՞նչ են հաւատք, եթե ոչ՝ յուսացելո՞ց իրաց հաստատութիւն, եւ յանդիմանութիւն որոց ոչն երեւին» (Եբրայ. ԺԱ:1): Այստեղ «յանդիմանութիւն» բառը նշանակում է. «...Յայտնապէս ներկայացնելը, ցոյց տալը, երեւան բերելը..., ապացոյց, ակնբեր՝ բացայայտ լինելը, ակնբերելութիւն...»¹⁵:

Թուս փիլիսոփայ Ն. Բերդեաեւի գտնում է, որ «ոչն երեւին»՝ չերեւացողները (կամ հակառակը՝ երեւացողները), բառը հարկաւոր է հասկանալ «ստիպողաբար տրուածութեամբ»¹⁶ բացակայութեան (կամ առկայութեան) իմաստով:

Ս. Պօղոսի սահմանումից երեւում է, որ խօսքը վերաբերում է այնպիսի իրողութիւնների, որոնք ապագայում լինելու, կամ այլ պատճառով, անմիջականօրէն զգայութեանը տրուած չեն: Ուստի դրանք կարող են տրուած լինել բացառապէս մտակառոյցի միջոցով: Հետեւաբար կարելի է եզրակացնել, թէ հաւատքը վերաբերում է, բացառապէս, ինչ-որ դատողութեան և / կամ դատողութիւնների հաւաստիութեան աստիճանին: Աստուծի լաւագոյն ապացոյցը «հաւատացեալ» հասկացութեան՝ կրօնի մէջ լայն շրջանառութիւն ստանալու իրողութիւնն ու ծագումն է. Թովմաս Առաքեալը՝ «Ամհաւատ» կոչուածը, կասկածի տակ է դնում Քրիստոսի Յարութեան լուրն արտայայտող դատողութիւնը՝ մտակառոյցը, և երբ յարուցեալ Քրիստոս երեւում է առաքելներին, այդ թուում նաեւ Թովմասին («ստիպողաբար տրուածութեամբ»՝ ցոյց տալով ու առաջարկելով շօշափել մարմնի վերքերը), ու ապացուցում իր Յարութեան լուրի իսկութիւնը, Տէր Յիսուսը խօսակցութիւնը եզրափակում է հետեւեալ արտայայտութեամբ. «...եւ մի՛ լինիր անհաւատ՝ այլ **հաւատացեալ**» (Յովհ. Ի:27):

Ու չնայեաժ, բազմաթիւ անգամ և՛ Աստուածաշնչում, և՛ Ղուրանում, հաւատ հասկացութիւնն օգտագործւում է բազմապիսի իմաստներով, սակայն բոլոր դէպքերն էլ փոխաբերութիւններ են, եթէ չեն արտայայտում հաւաստիութեան աստիճանի իմաստը: Յատկանշական է, որ Աստուածաշունչ մատեանի երկրորդ մասը՝ Նոր Կտակարանը, անուանւում է նաեւ Աւետարան: Մի բառ, որ ծագում է հին յունարէն «Ευαγγέλιον (evangelion)»¹⁷ բառից և նշանակում «Ուրախ լուրերու տեղ»¹⁸: Իսկ «լուրը» բաղկացած է լինում մտակառոյցից՝ դրոյթ(ներ)ից: Եւ, իհարկէ, պատահական չէ, որ Աւետարանը, երկրորդ իմաստով, նշանակում է «Որեւէ ուսմունքի հիմնական դրոյթների ամբողջութիւնը ներկայացնող շարադրամբ (գիրք, ժողովածու)»¹⁹:

Այսպիսով, քանի որ կրօնի տեսական-վարդապետական կողմը իրենից ներկայացնում է դրոյթների համակարգ՝ մտակառոյց, ուստի հաւատքն այն վերաբերմունքն է՝ վստահութիւնը, որը հաւատացեալը տածում է այդ դրոյթների նկատմամբ: Օրինակ՝ «ես հաւատում եմ Յարութեանը» արտայայտութիւնը փոխաբերութիւն-կրճատութիւն է, որը նշանակում է՝ «ես հաւատում եմ, թէ ճշմարիտ է այն պնդումը, ըստ որի, Քրիստոս յարութիւն է առել»: Ուրեմն՝ «հաւատ» հասկացութիւնը նշանակում է՝ «Հաստատուն համոզմունք...»²⁰, «...հոգիին ունեցած վստահութիւն ...»²¹, հաւաստիութեան զգացում ինչ-որ դրոյթի նկատմամբ:

Սուրբ Գրիգոր Տաթեւացի, «հաւատք» հայեցակարգը բացատրելիս, վկայակոչում է մի շարք հեղինակութիւնների, որոնք անվերապահ հեղինակութիւններ են բոլոր

¹⁵ Ղազարեան Ռուբէն Սերոբի, Գրաբարի Բառարան, Երևան, 2000, էջ 219:

¹⁶ Бердяев Н. А., "Философия Свободы – Смысл Творчества", Москва, «Правда», 1989, с. 45.

¹⁷ Աւետիքեան Հայր Գաբրիէլ, Սիւրմէլեան Հայր Խաչատուր, Ազգերեան Հայր Մկրտիչ, Նոր Բառագիրք Հայկազեան լեզուի, Վենետիկ, 1836, էջ 394:

¹⁸ Զիգմունդ Գեյտը, Հայերէն Աշխարհաբար Լեզուի Կիսկատար Բառարան, Հալէպ, 1954, էջ 565:

¹⁹ Աղայեան Էդուարդ Բագրատի, Արդի հայերէնի բացատրական բառարան, Երևան, 1976, 120:

²⁰ Նոյն տեղում, էջ 834:

²¹ Մանուկեան Նուրիկան Արք., Սուրբ Յակոբի Բեմէն, (53 Քարոզներ), Երուսաղէմ, 2004, էջ 35:

աւանդական եկեղեցիների համար, և մէջ բերում նրանց տուած սահմանումները. «... հաւատն է հիմն ամենայն առաքինութեան, ...սկիզբն հոգեւոր կենաց, ...սրբազան կրօնից հիմն»²², և այլն: Վերջապէս՝ ակնարկում է սուրբ Գրիգոր Լուսաւորչի հանրայայտ ձեւակերպումը՝ պնդելով, որ «հաւատն է մտաց լուսատրութիւն առ ի ճանաչել զժայրագոյն նշմարտութիւն»²³: Այս առումով՝ Ֆ. Տերտուլիանոսի՝ «Credo quia absurdum est (Հաւատում եմ, որովհետեւ անհեթեթ է)» յարացուցային յայտարարութիւնը²⁴ հանդիսանում է յայտանիշ՝ կրօնում հաւատքի ունեցած կենտրոնական դերի վերաբերեալ:

ե) **Փրկչականութիւն** (մեսիականութիւն). կարելի է ասել, մարդու վերաբերեալ, բոլոր կրօնների միակ նպատակը՝ մարդու փրկութիւնն է: Հետեւաբար, առաջ է գալիս, Փրկչի անձի հարցը: Եւ եթէ Պօղոս Առաքեալը հռետորաբար է հարցնում, թէ «Այր մի տառապեալ եմ ես. ո՞վ ապրեցուցէ զիս ի մարմնոյ աստի մահու» (Հռոմ. է:23), ապա պատճառն այն է, որ Փրկիչն արդէն յայտնել էր Իրեն. «...ո՛չ եկի թէ դատեցայց զաշխարհ, այլ զի փրկեցից...» (Յովն. ԺԲ:46), իսկ հետեւորդներն էլ իրար ասում էին. «...Գտա՛մ զմեսիայն...» (Յովն. Ա:41):

Հին Կտակարանում բազմաթիւ պատմութիւններ ունեն ներքոյիշեալ եզրափակիչ խօսքը. «...այսաւ արար Տէր զփրկութիւն...» (Ա. Թագ. ԺԱ:13): Մովսիսական յարացուցում տարբեր ժամանակներ տարբեր «փրկիչներ» են ի յայտ գալիս, որոնց միջոցով Աստուած, հրաշքներով ուղեկցուող, փրկութիւններ է առաքում Իր ժողովրդին: Եւ Յովսէփին պատկանող ներքոմէջբերեալ խօսքը լաւագոյնս փաստում է ասուածը. «...քանզի ի փրկութիւն առաքեց զիս Աստուած առաջի ձեր» (Մն. ԽԵ:6):

Դրութիւնը լիովին նույնն է նաեւ Իսլամի պարագայում: Չնայեա՞ծ որ բաւական կնճռոտ տարածայնութիւններ կան իսլամական ենթադրեալ փրկչի վերաբերեալ՝ կապուած սունի, շիա և այլ ուղղութիւնների, իմամականութեան ինստիտուտի, վախճանաբանական հակասական պնդումների, Իսայի, Մահաբի, Մուհամեդի, Դաշալի՝ Դատաստանի օրը կատարելիք դերի, և այլնի վերաբերեալ, սակայն «փրկչականութեան» հայեցակարգը անհրաժեշտաբար առկայ է և խիստ այժմէական նաեւ Իսլամում²⁵:

զ) **Անվերապահ խոնարհութիւն առ կրօնական առաջնորդը.** Երբ օրուայ քահանայապետ Անանիան հրամայեց՝ հարուածել ս. Պօղոս Առաքեալին, «Պաւլոս ասէ ցնա. Հարկանելոց է զեզ Աստուած, որմ բռեալ եւ դու նստիս դատել զիս ըստ օրինաց, եւ առանց օրինաց հրամայես զիս հարկանել» (Գործք ԻԳ:3): Սակայն երբ ս. Պօղոսին տեղեկացրին, որ հրամայողը քահանայապետն էր, Պօղոս առաքեալը յայտարարեց, թէ չգիտեր, որ քահանայապետն էր հրամայողը և յղուեց հինկտակարանեան հրահանգին «...զիշխան ժողովրդեան քոյ մի հայնոյեցես» (Ելից ԻԲ:28): Այսօրինակ անվերապահ խոնարհութիւնը բազմիցս է հանդիպում հինկտակարանեան կրօնական առաջնորդների՝ դատաւորների, քահանաների, մարգարէների, թագաւորների..., պարագայում, իսկ Քրիստոնէութեան շրջանակներում՝ Պօղոս Առաքեալը յստակ կարգադրում է. «Ունկնդի՛ր լեռոմ առաջնորդաց ձերոց, եւ հպատակ կացի՛մ նոցա...» (Եբր. ԺԳ:17): Այլեւ՝ «Աղաչեմ զձեզ եղբար՝ ճանաչել զվաստակաւորս եւ զվերակացուս ձեր ի Տէր, եւ զխրատիչս ձեր» (Ա. Թեսալ. Ե:12-13): Այս աւանդութիւնը առաւել ամրապնդում է յետագայում և իր բառացի արտայայտութիւնն ունենում, ի թիւս բազմաթիւ փաստաթղթերի, Սուրբ Իգնատիոս Աստուածազգեացի նամակներում. «... Եպիսկոպոսին պէտք է նկատել ինչպէս անձամբ Տիրոջը»²⁶:

²² Գրիգոր Տաթեւացի, Գիրք հարցմանց, Երուսաղէմ, 1993, էջ 573:

²³ Նոյն տեղում, էջ 571:

²⁴ Տե՛ս Tertullianus Quintus Sept. Flor., «De Carne Christi», Tertullian's Treatise on The Incarnation, LONDON, S.P.C.K., 1956, էջ 19:

²⁵ Սահակեան Նաիրա, «Իսլամական Պետութեան» Կողմից Վախճանաբանական Պատկերացումների Ակտուալացման Փորձերը, Երեւանի Պետական Համալսարան, Քաղաքակրթական և Մշակութային Հետազոտութիւնների Կենտրոն, Վերլուծական Տեղեկագիր, Երեւ Ժողովրդի համակարգ, թիւ 9, Երեւան, 2016, էջեր 179, 182 -183:

²⁶ Իգնատիոս Սբ. Անտիոքացի, «Նամակներ», թարգմանեց՝ Մաշտոց Վահէ Դազարեան, Երեւան, 2011, էջ 50:

Վերջապէս՝ Իսլամում այնքան էական դեր է յատկացուած խոնարհութեանը, որ այն յաճախ դիտուում է՝ որպէս ստրկացնող կրօն. մի իրողութիւն, որ արտայայտուած է նաեւ սոյն կրօնի անուան մէջ: Այս նկատառումով՝ իսլամական բազմաթիւ մտաւորականներ փորձում են «իսլամ» բառի առաջացումը բխեցնել «խաղաղութիւն» հասկացութիւնից՝ ի հակադրութիւն «ենթարկուած», «ստրկացած»-ի²⁷:

է) **Տեղիքի ճշմարտութեան վաւերականութիւն՝ անձնաւորման միջոցով.** էական հարցերի վերաբերեալ տեղեկութեան վաւերականութիւնը պայմանաւորուած է հեղինակի բարձր դիրքով (հեղինակի սրբութիւնից՝ տեքստի հաղորդումի բացարձակ ճշմարտացիութիւն). նոյնիսկ առաջին դարում, երբ տեքստը հաղորդում էր մի վիճելի դրոյթ, կասկածի տակ էր դրուում, ոչ թէ դրոյթի ճշմարտացիութեան հարցը, այլ հեղինակի ով լինելը: Եւ եթէ հաստատուէր, թէ տեքստը պատկանում է այն սուրբ հեղինակին, որը տուեալ տեքստում ներկայացուած է որպէս հեղինակ, ապա դրոյթը կ'ընդունուէր անվերապահօրէն: Ահա այս է նաեւ պատճառներից մէկը, որ Պօղոս Առաքեալը տարբերակիչ նշան է տալիս իր ընթերցողներին. «Ողջոյնս՝ իմոյ ձեռին Պաւլոսի է, որ է նշանակ յամենայն թուրքս այսպէս գրեմ» (Բ Թեսալ. Գ:17): Այս աւանդոյթը շարունակուեց, և Աստուծոյ մասին գիտելիք ստանալու հիմնական «տեղի» (տեղեկութեան աղբիւր), ի թիւս այլնի, համարուում են այն գրուածքները, որոնք հեղինակել են «Աստուածաբան Եկեղեցու» (ուղղափառ հայրեր և մեր եկեղեցու աստուածաբան վարդապետներ)²⁸:

Մովսիսականութեան բոլոր ճիւղերն էլ ընդունում են, որ Հնգամատեանի առնուազն առաջին չորս գրքերը հեղինակել է Մովսէսը՝ աստուածային ներշնչմամբ. «Եւ ասէ Տէր ցՄովսէս. ել առ իս ի լեառն...: Եւ տաց քեզ տախտակս քարեղէնս եւ արէնս եւ պատուիրանս, զորս գրեցի, լինել նոցա արէնսդիր» (Ելից ԻԴ:12):

Ղուրանի պարագայում տեքստի հեղինակը համարուում է Ալահը, ով «ներքեւ է ուղղարկել Գիւրը» (ի թիւս բազմաթիւ օրինակների՝ Սուր. 6:90): Իսկ Մուսնայի պարագայում, հադիթը վաւերական է համարուում, եթէ այն բաւարարում է իսնադի՝ շղթայի սկզբունքը. իսլամական գրիչները, հադիթ վկայակոչելիս, թուարկում են այն մի քանի հեղինակներին, որոնց միջոցով հադիթը, նոյն ճշգրտութեամբ, հասել է մեր ժամանակներ²⁹:

ը) **Ժառանգորդութիւն.** ցանկացած կրօնական կառոյց իր գործունէութեան վաւերականութեան առաջին պայման է համարում ուղիղ կապը իր նախորդ սերնդի և անուղղակի կապը կրօնի հիմնադրի հետ: Այս նկատառումով Մուհամմեդը Իսլամը, իբրեւ շարունակութիւն, նոյնացնում է Մովսիսականութեան ու Քրիստոնէութեան հետ և յայտարարում, թէ մինչ ինքը, Ալահը մարդկանց մօտ ուղարկեց «Նոյին և Մարգարէներին՝ նրանից յետոյ, ...Աբրահամին և Իսմաիլին և Իսահակին և Յակոբին ու նրա զաւակներին, Յիսուսին և Այուբին և Յարունին և Սուլեյմանին: Եւ մենք Դաւիթին տուեցինք Զաբուրի (Սաղմոսների) Գիրքը» (Սուր. 4:163): Իսկ Մուհամմեդի մահուանից յետոյ, մուսուլմանական համայնքի (ումա) ղեկավարի ժառանգորդման սկզբունքի բացակայութեան պատճառով, տեղի ունեցաւ առաջին ներհամայնքային պառակտում-պատերազմը (Ֆիթնա), և առաջացան սունիական, շիական, խարիջիական (յետոյ էլ՝ իբադիական), և մի շարք այլ (ենթա)ուղղութիւններ: Իսլամն իր ողջ պատմութեան ընթացքում չկարողացաւ հիմնովին լուծել այս խնդիրը, ու թէեւ շիականութիւնն՝ իր մի շարք ճիւղերով հանդերձ, ընդունում է իմամութեան ինստիտուտը, սակայն միեւնոյն է՝ առաջնորդի վաւերականութեան հարցում, Իսլամը ներկայումս էլ լուրջ ճգնաժամ է ապրում³⁰:

Ինչ վերաբերում է Մովսիսականութեանը, ապա Մովսէսի գործունէութեան

²⁷ Տէւ, Ramadan Tariq, Islam: The Essentials, Penguin Random House UK, First published 2017, էջ 75.

²⁸ Գալուստեան Շնորհք եպս., «Տեղիք Աստուածաբանութեան», Երուսաղէմ, 1985, էջ 1:

²⁹ Տէւ, նոյն տեղում, էջ 70:

³⁰ Տէւ, Ramadan Tariq, Islam: The Essentials, Penguin Random House UK, First published 2017, էջ 39 - 43.

սկիզբը, որը տեղի ունեցավ անապատում, երբ Մովսէսին երեւաց այրուող ու չկիզուող մորենին, Աստուած նրան ներկայանում է՝ շեշտադրելով ժառանգորդութիւնը. «Եւ ասէ ցնա, Ես եմ Աստուած հաւր քոյ, Աստուած Աբրահամու. եւ Աստուած Սահակայ. եւ Աստուած Յակոբայ» (Ելից Գ:6): Այս բանաձեւը յետագայում հանդիսացավ Մովսէսի «այցեփար»-ը իր ժողովրդի մօտ:

Վերջապէս, Քրիստոնէութեան պարագայում, ժառանգորդութեան այս սխեման իրականացում է ձեռնադրութեան միջոցով (տե՛ս, օրինակ, Ա. Տիմ. Ե:14): Եւ այս նկատառումով է, որ Հայոց կաթողիկոսները ձեռնադրուելիս՝ հանդիսաւորապէս երդւում են, որ իրենք պահպանելու են ս. Թադէոս և ս. Բարդուղիմէոս առաքեալների ու ս. Գրիգոր Լուսաւորչի հիմնադրութիւնները³¹: Այլեւ՝ «Եթէ մէկը շեղուի առաջնայն վարդապետութիւնից, օտարանայ նոցա աւանդութիւններից, կը տրուի նոցա ձեռնադրական-շնորհաբաշխական յաջորդութիւնից, նա չի լինիլ և Քրիստոսի ճշմարիտ եկեղեցի»³²: Ա. Տեր-Միքէլեանի այս դրոյթը միանշանակ համոզմունք է բոլոր աւանդական Եկեղեցիների համար, որոնք իրենց հիմնադրման պահից ցայսօր շարունակում են յորդորել իրենց հաւատացեալներին. «Թող այսօր անգամ մը եւս վերանորոգեմք մեր ուխտերը մնալու հարազատ ու հաւատարիմ զաւակները մեր Մայր Եկեղեցոյ, միշտ ըլլալու նուիրեալ անդամները մեր նախահայրերէն մեզի աւանդ մնացած այս մեծ սրբութեան...»³³:

Յաւելենք, որ որպէս «կրօն» հայեցակարգի տարր, կարելի է արձանագրել նահատակութիւն, խոստովանահայրութիւն, համայնքայնութեան, պատերնալիզմ (հայրախնամութիւն), նեպոտիզմ (խնամակալութիւն), ճգնակեցականութիւն, անհատի՝ անցեալի նկատմամբ ատելութիւն ու ապագայապաշտութիւն, բանադրանք, ուղղափառութիւն, հերձուածողութիւն, վախճանաբանականութիւն և էլի մի շարք իրողութիւններ, որոնց համադրութիւնից ձեւակերպւում է «կրօն» հայեցակարգը: Սակայն այս «յաւելումներին» առանձնայատուկ շնք անդրադառնում, որովհետեւ, մեր կարծիքով, սրանք և մնացած բոլոր կրօնական իրողութիւնները լիովին արտայայտւում են մեր արձանագրած, թուով ութ, կէտերի շրջանակներում: Միւսները վեր են առնւում սրանց մէջ:

Վերը կատարուած «կրօն» հայեցակարգի վերլուծութիւնը կ'ամբողջանայ՝ համադրուելով Միսիթարեան հայր Ղեւոնդ Ալիշանի մեկնաբանութիւնների հետ, ըստ որի, լատիններէնի «...և իր գաւալքն...» ռելիգիո կամ ռելիգո (religio / religio) «կ'անուանէ զայս, ...ստուգաբանէն կապ, կապեալ, կապուիլ, հաշուէ մարդկան ընդ Աստուծոյ կամ երկնից, հաշուէ մանաւանդ մարդկան իրարու հետ», սկզբնական չէ, այլ ծագել է մէկ այլ հիմքից. այս հասկացութեան իմաստը կանխաւ ենթադրւում է, որ կայ ինչ-որ բան, որի հետ կապւում են մարդիկ: Իսկ հայերէն «կրօն»-ը «ինքնութիւն կամ ինքնաբերութիւն մի յայտնէ»: Ալիշանը, վկայակոչւում է մի հին անյայտ հեղինակի, որը տալիս է շատ հակիրճ ու իմաստալից ստուգաբանութիւն. «Կրօն՝ Կիր և Հաւանութիւն»: Այս «Կիր»-ը կրելու արմատն է, որտեղից էլ կիրք ու, հետեւաբար, «ներքին և բուռն ինքնաբեր զգացում ...և հզօրագոյն կիրք բանաւոր մարդու ...և պարտաւորութիւնն առ գերագոյն էակն: Վայելչապէս յարէ ստուգաբանն՝ կրից հետ և Հաւանութիւն. իբրեւ անընդմէջ կամ անհրաժեշտ հետեւանք այդպիսի կրից հոգւոյ...»³⁴: Ալիշանի այս բացատրութիւնը լիովին համաձայնում է մի շարք բառարաններում կրօն բառի ստուգաբանութեան մէջ հանդիպող «Կարգ, կանոն, օրէնք...: Կեանք, վարք, կենցաղավարութիւն»³⁵, «սովորութիւն, վարդապետութիւն, հաւատք»³⁶ հասկացութիւնների

³¹ Տե՛ս, Տեր-Միքէլեան Արշակ, «Հայաստանեայց Սուրբ Եկեղեցու Քրիստոնէականը», Ս. Էջմիածին, 2007, էջ 326:

³² Նոյն տեղում, էջ 283:

³³ Մանուկեան Նուրիան Արք., Սուրբ Յակոբի Բեմէն, (53 Քարոզներ), Երուսաղէմ, 2004, էջ 177:

³⁴ Ալիշան Ղեւոնդ, «Հին Յաւատք կամ Հեթանոսական Կրօն Հայոց», Վենետիկ - Ս. Ղազար, 1910, էջ 8-9:

³⁵ Ղազարեան Ռուբէն Սերոբի, «Գրաբարի Հոմանիշների Բառարան», Անթիլիաս, 2006, 395:

³⁶ Աճառեան Հրաչեայ, «Հայերէն Արմատական Բառարան», Երեւան, 1926, էջ 685:

իմաստներին: Իսկ այս բոլոր հասկացություններն ունեն մէկ էական յատկանիշ, որը ընդհանուր է բոլորի համար էլ. «...նշանակութեամբ կարեւորութեամբ, ուղղութիւնում առանպայմանականութիւնը...»:

Արդ՝ պայքարելը անկրօնութեան, այլակրօնութեան, հերետիկոսութեան և հերձուածողութեան դէմ եղել ու մնում է բոլոր կրօնների հիմնական գործունէութեան ձեւերից մէկը: Սա կրօնի հիմնարար սկզբունքներից է, որն, ինչպէս վերը ցոյց տրուեց, բխում է իր իսկ էութիւնից: Ուրեմն կրօնի դէպքում, ոչ միայն վաւերական է բախումն իր հիմնարար դրոյթներին հակասող դրոյթների պաշտպանների հետ, այլեւ պարտադիր. սա կրօնի գոյութեան ձեւն է: Այս հակամարտայնութիւնը, կրօնի պարագայում, ոչ միայն վաւերական, այլեւ լինելիութեան անհրաժեշտ պայման է:

Մինչեւ 19-20-րդ. դդ. գիտնականների կրօնական հաւատք ունենալը, որն ուղեկցում էր նրանց գիտական գործունէութեանը, բաւական տարածուած մի իրողութիւն էր: Այս մօտեցմանը զուգահեռ՝ միշտ առկայ է եղել նաեւ հակադիր՝ հակակրօնական մօտեցումը, որն առաւել համակարգային ընթացք է ստանում, երբ «Դարուի մի բուրգը»՝ Թոմաս Հենրի Հաքսլին, հիմնում է «Իֆս ակումբ (X-club)»-ը, որի շրջանակներում մի շարք պրոֆեսիոնալ գիտնականներ սկսում են պայքարել կրօնի դէմ: Հակամարտութեան այս բախումը ծաւալում էր, մասնաւորապէս էվոլյուցիոնիզմի շուրջ³⁷:

Կրօնն էլ, յանձին Քրիստոնէութեան, ոչ միայն պաշտպանում է, այլեւ նախաշարժակ լինում: Այս բախումները, համակարգուած ձեւով ներկայացւում են գիտա-կրօնական «հանդիսատեսին» 1960-ական թուականներից՝ ի դէմս «Zygon» (հիմնադրուել է 1966թ.) ամսաթերթի, որի թեմատիկ ուղղութիւնը գիտա-կրօնական հիմնախնդիրներն էին³⁸:

Չնայեաժ որ հակամարտութիւնը շարունակւում է նաեւ ներկայումս, սակայն հակամարտող երկու բանականներում էլ եղել են ու կան մի շարք փոխգիշտումներ, և անձինք, ովքեր մտահոգուած են՝ ոչ թէ այն խնդրով, թէ կողմերից ո՞րն է ճշմարտութիւնն ասում, իսկ միւսը կեղծիքը, այլ կողմերի յաշտեցմամբ և ներդաշնակեցմամբ. որոշ մտածողներ գտնում էին, որ գիտութիւնն ու կրօնը գործառնում են լիովին առանձին հարթութիւնների վրայ, և դրանք միմեանց չեն կարող հակադրուել: Որոշները փորձում են պնդել, որ կրօնն իր արգելքներով, նոյնիսկ, մի շարք օգուտներ է բերել գիտութեան առաջխաղացմանը, իսկ ներկայումս, նոյնիսկ, հարցականի տակ է դրւում կրօն-գիտութիւն հակամարտային մոդելի իսկութիւնը:

Այն հակամարտային մոդելը, որը ցոյց է տալիս, թէ գիտութիւնն ու կրօնը ինքնին և սկզբունքօրէն հակամարտութեան մէջ են, պատմական, ընդամենը, երկու հիմք է գտնում. Գալիլեոյի դատաւարութիւնը և էվոլյուցիոնիզմին առնչուող դէպքերը. «Հակամարտային մոդելը զարգացուել ու պաշտպանուել է 19-րդ դարում, հետեւեալ՝ ձոն Դրափերի «Կրօնի և գիտութեան հակամարտութեան պատմութիւն» (1874) և Ուայթի երկհատորեակ՝ «Քրիստոնէութեան մէջ գիտութեան և աստուածաբանութեան պատեհազմի պատմութիւնը» հրատարակութիւններով³⁹:

Էվոլյուցիոնիզմի շրջանակներում կրօնի և գիտութեան յաշտեցման գործընթացներից նշանակալի հայեցակարգերից մէկը Սթիվեն Ճեյն Գուլդի հեղինակած «Չխաչուող վարդապետութիւն» (Nonoverlapping Magisteria) է, որը հեղինակը հապաւում է որպէս՝ «NOMA»⁴⁰: Հեղինակը գտնում է, թէ այս «վարդապետութիւն» արդէն իսկ

³⁷ Տե՛ս, **Desmond Adrian J.**, Thomas Henry Huxley, Encyclopaedia Britannica, <https://global.britannica.com/biography/Thomas-Henry-Huxley>.

³⁸ **De Cruz, Helen**, “Religion and Science”, The Stanford Encyclopedia of Philosophy (Spring 2017 Edition), First published Tue Jan 17, 2017, 1.1.

³⁹ Նոյն տեղում, 1.3:

⁴⁰ **Gould Stephen Jay**, Nonoverlapping Magisteria, archive, <http://www.blc.arizona.edu/courses/schaffer/449/Gould%20Nonoverlapping%20Magisteria.htm>.

առկայ էր Յովհաննէս Պօղոս II Պապի Գիտութիւնների Պոնտիֆիկալ Ակադեմիային ուղղուած 1996թ.-ի հոկտեմբերի 22 հաղորդագրութեան մէջ, ըստ որի, Յովհաննէս Պօղոս II-ը վերահաստատում է Պիոս XII-ի դրական վերաբերմունքը էվոլյուցիոնիզմի վերաբարեբաւ: Սակայն Պապն առաջադրում է մի շարք վերապահումներ՝ կանխաւ արձանագրելով, որ չի կարելի խոսել մէկ-միանշանակ տեսութեան մասին, այլ հարկաւոր է հաշուի առնել, որ ասպարէզում առկայ են էվոլյուցիոնիստական մի շարք տեսութիւններ: Դրանք կարող են ընդունելի լինել, եթէ չեն հակասում Պիոս XII-ի յայտարարութեանն այն մասին, որ «...Կաթոլիկ հաւատքը պարտաւորեցնում է մեզ՝ պնդել, որ հոգին ստեղծուած է անմիջականօրէն Աստծոյ կողմից»⁴¹: Յովհաննէս Պօղոսը հռետորական հարցադրմամբ ակնարկում է քիմիայի ու ֆիզիկայի ոլորտներում կատարուող ուսումնասիրութիւնների և էվոլյուցիոնիզմի միջեւ անհրաժեշտաբար առաջացող հակասութիւնը, եթէ ընդունուի, իբր մարդու «...հոգին կամ առաջանում է կենդանի նիւթի ուծերից կամ՝ որպէս այդ նիւթի պարզ էպիֆենոմեն. սրանք անհամատեղելի են մարդու մասին ճշմարտութեան հետ»⁴²: Պապն առանձնացնում է փորձարարական գիտութիւնների հետազոտական դաշտը և ոգեկան ոլորտն ուսումնասիրող գիտակարգերի օբյեկտներն ու ոլորտները: «Չմայեա՛ծ, շարունակում է Վատիկանի Սուրբ Հայրը, մենք, յամենայն դէպս, կարող ենք նկատել մի շարք արժեքաւոր տուեալներ, որոնք վերաբերում են մասնատրապէս մարդկային կեանքին: Բայց ինքնագիտակցութեան և ինքնանաւաշման մետաֆիզիկական գիտելիքի փորձառութիւնը, բարոյական խղճի, ազատութեան կամ գեղագիտական ու կրօնական փորձառութիւնը հարկ է վերլուծել փիլիսոփայական ինքնահայեցողութեան միջոցով. մինչդեռ աստուածաբանութիւնը հետամուտ է պարզելու Արարչի արարման սահմանային նշանակութիւնը»⁴³:

Վերը յիշատակուած «Զխաշուող վարդապետութեան» շրջանակներում Սթիվեն Գոլդը պատմում է մի անձնական փորձառութիւն, երբ իր ուսանողը, լինելով կաթոլիկ քրիստոնեայ, մի բողոքականի գաղափարների ազդեցութեան ներքոյ, շատ կտրուկ հարց է առաջադրում իրեն՝ որպէս դասախօս-գիտնականի. «Ես համոզուած եմ իստոնեայ եմ և էվոլյուցիոնիզմի նկատմամբ կասկած ունենալու պատճառ երբեք չեմ ունեցել...: Ասա՛ ինձ՝ կարո՞ղ է մարդը հաւատալ երկուսին էլ՝ Աստծուն և էվոլյուցիային»⁴⁴: Մերժելով արմատական (ֆունդամենտալ) բողոքականների կրեացիոնիստական հայեացքները՝ Գոլդը, որպէս այդ մօտեցման անհիմն պատճառ, մատնանշում է բողոքականների հաւատն առ «Աստուածաշնչի իւրաքանչիւր բառի տառացի ճշմարտացիութիւնը», որը, ըստ նրա ոչ մի բանական հիմնաւորում չունի⁴⁵:

Յանուն արդարութեան, հարկ է նշել, որ բողոքականները միայն այս հարցում չէ, որ առանց բանական հիմնաւորման, ուղղակի պնդումներ են կատարում: Սակայն հարկ է նաեւ նշել, որ հէնց իր իսկ տեսութեան և Պապի յայտարարութեան համաձայն, ինքը՝ Ս. Գոլդը, մասնագիտական ոչ մի վաւերականութիւն չունի նման դատողութիւններ կատարելու համար, մասնաւորապէս որ, քիչ թէ շատ, տեղեակ է միայն քրիստոնէութեան կաթոլիկ և բողոքական ուղղութիւններին. Արեւելեան Եկեղեցիների (նաեւ՝ այլ կրօնների) մասին՝ խօսք չկայ:

Գոլդը գտնում է, որ կրօնական կառոյցները, այդ թուում նաեւ իր ազգակիցները

⁴¹ Pius XII, Encyclical Humani Generis of The Holy Father Pius XII to Our Venerable Brethren, Patriarchs, Primates, Archbishops, Bishops, and other local ordinaries enjoying peace and communion with The Holy See concerning some false opinions threatening to undermine The Foundations of Catholic Doctrine, point 36, http://w2.vatican.va/content/pius-xii/en/encyclicals/documents/hf_p-xii_enc_12081950_humani-generis.html .

⁴² John Paul II Pope, Message To The Pontifical Academy Of Sciences: On Evolution Magisterium Is Concerned with Question of Evolution for It Involves Conception of Man, point 5, <https://www.ewtn.com/library/PAPALDOC/JP961022.HTM> .

⁴³ Նոյն տեղում, կէնտ 6:

⁴⁴ Gould Stephen Jay, Nonoverlapping Magisteria, archive, <http://www.blc.arizona.edu/courses/schaffer/449/Gould%20Nonoverlapping%20Magisteria.htm> .

⁴⁵ Տե՛ս, նոյն տեղում:

(Գուլդը հրեայ է) դիմել են վայրենությունների, որովհետեւ ժամանակին իրենց ձեռքում կենտրոնացրել են քաղաքական մեծ իշխանություն⁴⁶:

Վերջապէս՝ եզրակացնում է Ստիվեն Գուլդը, որ ի տարբերութիւն գիտութեան, «Կրօնի ցանցը տարածում է բարոյականութեան նշանակութեան և արժէքի հարցերի վրայ: Այս երկու վարդապետութիւնները (իմա՝ կրօնական և գիտական - Գ. Յակոբեան) չեն խաչում, ոչ էլ զբաղեցնում են ողջ տարածքը (համեմատի՛ր, օրինակի համար, արուեստի ուսուցումը և գեղեցիկի նշանակութիւնը)»⁴⁷:

Այսպիսով՝ Ս. Գուլդը «խմբագրում» է Յովհաննէս Պօղոս II Պապի մտքերը և կրօնին վերապահում միայն բարոյական ինչ-ինչ հարցեր. մի բան, որը բացակայում է Պապի հաղորդագրութեան մէջ: Գուլդը ճիշդ չի մեկնաբանում Պապի ուղերձի տեքստը՝ անտեսելով մի շարք պայմաններ, որոնք ուղիղ տեքստով արտայայտուած էին երկու պապերի ուղերձներում էլ: Յատկանշական է, որ Յովհաննէս Պօղոս Պապը խիստ վերապահումով է ընդունում էվոլյուցիոնիստական միայն որոշ տեսութիւններ, իսկ կտրականապէս անընդունելի է համարում, Պիոս XII Պապի յիշատակած այնպիսի էվոլյուցիոնիզմը, որը «...բացատրում է ամէն ինչի ծագումը և լիտիաբար պաշտպանում մոնիստիկ և պանթէիստիկ այն կարծիքը, իբր աշխարհը շարունակում է իր էվոլյուցիան»⁴⁸: Պիոս Պապը յիշատակում է նաեւ որոշ տեսակի իմմանենտիզմ, պրագմատիզմ, էքզիստենցիալիզմ, դիալեկտիկական մատերիալիզմ, հիստորիցիզմ, կոմունիզմ⁴⁹, և այլ մետաֆիզիկական ուղղութիւններ և դպրոցներ, որոնք անընդունելի են Կաթոլիկ եկեղեցու համար:

Անիմաստ չէ նկատելը նաեւ, որ կաթոլիկական այս մօտեցումը նոյնպէս նորութիւն չէ. գրեթէ օրինաշափութեան մակարդակի են հասնում պատմական այն իրողութիւնները, երբ Կաթոլիկ եկեղեցին, կանխաւ խիստ ագրեսիւ և կոշտ դիրքորոշում որդեգրած լինելով, յետագայում զիջում է կամ, նոյնիսկ, դառնում իր իսկ կողմից խիստ մերժման արժանացած իրողութեան ջատագովը: Սակայն սա մի շարք ապացոյցներ պահանջող լուրջ ուսումնասիրութեան կարօտ թեմա է, որը չի մտնում մեր ներկայիս ուսումնասիրութեան շրջանակների մէջ:

Այսպիսով, որպէսզի գիտութիւն և կրօն հակամարտային մոդելի լեգիտիմութեան հարցը պարզուի հարկաւոր է յստակ ճշգրտել նաեւ «գիտութիւն» անուանման ներքոյ հանդէս եկող իրողութիւնը:

Պապի յիշատակած բոլոր տերմինները, այդ թուում նաեւ էվոլյուցիան (այն իմաստով, որով կիրառում է Պիոս XII-ը) գիտական տեսութիւնների անուանումներ չեն, սակայն սերտ կապ ունեն գիտութեան հետ: Եւ հէնց սա է գլխաւոր պատճառներից մէկը, որ Յովհաննէս Պօղոսը առաջադրում է համապատասխան սահմանափակումը, իսկ Պիոսը յատուկ շեշտում, որ ինչ-ինչ տեսութիւններ միախառնուելով հանդէս են գալիս մէկ ընդհանուր անուանման ներքոյ. մի անուանում, որն իրականում լիովին այլ նշանակութիւն ունի: Հետեւաբար «խայծի» դեր է կատարում⁵⁰:

Ինչ վերաբերում է «գիտութիւն» հասկացութեանը, ապա այն նոյնպէս խիստ հեռաւոր արմատներ ունի մարդկութեան պատմութեան մէջ, սակայն արդի իմաստային կիրառութիւնը ստացել է 19-րդ դարում, երբ Ու. Ուվելը մշակեց այս հասկացութեան ներկայիս իմաստը՝ առանձնացնելով այն, այսպէս կոչուած, բնութեան կամ փորձա-

⁴⁶ Տէ՛ս, նոյն տեղում:

⁴⁷ Տէ՛ս, նոյն տեղում:

⁴⁸ Pius XII, Encyclical Humani Generis of The Holy Father Pius XII to Our Venerable Brethren, Patriarchs, Primates, Archbishops, Bishops, and other local ordinaries enjoying peace and communion with The Holy See concerning some false opinions threatening to undermine The Foundations of Catholic Doctrine, point 5, http://w2.vatican.va/content/pius-xii/en/encyclicals/documents/hf_p-xii_enc_12081950_humani-generis.html .

⁴⁹ Տէ՛ս, նոյն տեղում, կէտեր՝ 5 - 7:

⁵⁰ Տէ՛ս, նոյն տեղում:

րարական փիլիսոփայությունից⁵¹:

«Գիտութեան» ներքոյ ներկայումս հասկացում է «...համաշոգական գործունեութեան իւրայատուկ ձեւ, որի նպատակն աշխարհի մասին օբյեկտիւ, համակարգայնօրէն կազմակերպուած և հիմնաւորուած գիտելիքի մշակումն է: ...Գիտութիւնը նպատակադրում է ի ցոյց հանել օրէնքներ, որոնց համապատասխանութեամբ, օբյեկտները կը ձեւայնանան մարդկային գործունեութեան մէջ»⁵²: Իսկ «օրէնք»-ի ներքոյ պէտք է հասկանալ այն, ինչն «...իրենում արտայայտում է մեր գիտակցութիւնից անկախ այն փաստը, որ շրջակայ աշխարհի իրերն ու երեւոյթները գործառնում և զարգանում են համապատասխան իրենց յատուկ գոյութեանը՝ անհրաժեշտ, կրկնող, կայուն յարաբերութիւններով (կապերով): Օրէնքի կարեւորագոյն յատկանիշներն են՝ անհրաժեշտութիւնը, համընդհանրութիւնը, կրկնելիութիւնն ու ինվարիանտութիւնը»⁵³: Այսինքն՝ գիտութիւնը նպատակադրում է ի ցոյց հանել այնպիսի բանաձեւեր, որոնք արձանագրում են աշխարհի իրերի և երեւոյթների անհրաժեշտ, կրկնող, կայուն կապերը, որոնք տեղի են ունենում անհրաժեշտաբար, համընդհանուր են, կրկնելի և ինվարիանտ:

Հասկանալի է, որ գիտութիւնը ճանաչողութեան միակ ձեւը չէ, և չի էլ կարող գործառնել զուտ միայն ինքնին կերպով: Այն հանդէս է գալիս շաղկապուած հոգեկանի բոլոր գործընթացների և իրողութիւնների հետ միասին, որոնցից որոշների կամ սրանց որոշ մասերի ուղղակի կապը մեծ ազդեցութիւն ունի գիտութեան իրականացման և գիտական գործընթացների վրայ:

Գիտութեան սոցիոլոգ և փիլիսոփայ Թոմաս Շմուէլ Կունը գիտութեան իրականացման ողջ ընթացքը բացատրում է գիտական յեղափոխութիւնների տեսութեան միջոցով: Ներկայ ուսումնասիրութեան շրջանակներից դուրս է այնպիսի մի շարք հարցերի անդրադառնալը, ինչպիսիք են գիտակարգի (գիտութեան) և յարացոյցի յարաբերութիւնները, գիտակարգի ձեւայնացման գործընթացը յարացոյցի ներսում, նոր յարացոյցի ի յայտ գալը, և նմանատիպ այլ հայեցակէտեր, որոնք կենտրոնական դեր ունեն Թ. Կունի տեսութեան մէջ: Սակայն մեր թեմային սերտօրէն առնչւում է այս հիմնարար հայեցակարգում նոր ծնունդ և կենսագրութիւն ստացած «յարացոյց» (պարագիգմայ) հայեցակէտը:

Ըստ Կունի, ամէն գիտութեան գիտակարգային մատրիցան՝ յարացոյցը, համընդհանրական նմոյշը⁵⁴, որի շրջանակներում գործառնում է «նորմալ գիտութիւնը», բաղկացած է չորսից աւելի⁵⁵ տարրերից. «նշանային ընդհանրականներ», «մետաֆիզիկական յարացոյց», «արժէք», «նմոյշ»:

Նշանային ընդհանրականները արտայայտւում են նշանների և / կամ բառերի միջոցով, ու համընդհանուր ընդունելութիւն գտնում գիտնականների համայնքում: Սրանք իրականացնում են երկու գործառնութ. առաջին՝ գիտնականները սրանց օգնութեամբ կառուցում և կիրառում են տրամաբանական ու մաթեմատիկական հասկացութային ապարատներ: Իսկ երկրորդ գործառնութը՝ «...ոչ միայն օրէնքների դերում հանդէս գալն է, այլ նաեւ որոշ սիմվոլների որոշարկումը, որոնք դրանք պարունակում են»⁵⁶:

Գիտակարգային (գիսցիպլինար) մատրիցայի երկրորդ տարրը մետաֆիզիկական յարացոյցն է կամ յարացոյցի մետաֆիզիկական մասերը: «Այստեղ ես, - գրում է Կունը, - ի նկատի ունեմ համընդհանուր ընդունելութիւն գտած վերագրութիւններ, օրինակ՝ ջերմութիւնը մարմնի մասնիկների կինետիկ էներգիան է...»: Այս «...վերագրումների

⁵¹ De Cruz, Helen, “Religion and Science”, The Stanford Encyclopedia of Philosophy (Spring 2017 Edition), First published Tue Jan 17, 2017, 1.2.

⁵² Степин В.С., Наука, Всемирная Энциклопедия Философия, Москва - Минск, 2001, с. 673.

⁵³ Самушиц Т. В., Закон, Всемирная Энциклопедия Философия, Москва - Минск, 2001, с. 358.

⁵⁴ Տե՛ս, Кун Томас Структура Научных Революций, Москва, 2003, էջ 441:

⁵⁵ Տե՛ս, նոյն տեղում, էջ 440:

⁵⁶ Նոյն տեղում, էջ 235:

պատճառով փոփոխում է հայեցակարգային մոդելի սպեկտրը՝ սկսած յայտաձևական (էվրիստիկական), վերջացած գոյաբանական մոդելներով...»: Այս մոդելները, «Ի թիւս այլնի, գիտական հանրութեանը մատակարարում են նախընտրելիութիւններ և փոխաբերութիւններ»: Այս ամէնը գիտնականներին «...օգնում է որոշակիացնել, թէ ի՞նչը պէտք է ընդունուի՝ որպէս գլոխկոտրուկի լուծում և որպէս բացատրութիւն»⁵⁷:

Գիտակարգային մատրիցայի երրորդ տարրն արժէքն է: «Զնայեաժ սրանք գործառնում են մշտապէս, պնդում է Թոմաս Կունը՝ մեկնաբանելով «արժէք» հայեցակէտը, սակայն դրանց իւրայատուկ կարեւորութիւնը նկատում է այն ժամանակ, երբ այս կամ այն գիտնականների համայնքի անդամներն իրենց գիտութեան ոլորտում հարկադրուած են՝ ի յայտ բերելու ճգնաժամ կամ, յետագայում, ընտրել ուսումնասիրութեան անհամատեղելի ճանապարհներից մէկը: Արժէքի առաւել արմատականացումը վերաբերում է կանխասացմանը. դրանք պէտք է լինեն ճշգրիտ, փանակական, ...»⁵⁸: «Գոյութիւն ունեն արժէքների տեսակներ, օրինակ, այն տեսակէտը, որ գիտութիւնը պէտք է (կամ պէտք չէ) օգտակար լինի հասարակութեանը...»⁵⁹:

Արժէքների վերաբերեալ Կունի պնդումներից խիստ յատկանշականն այն է, որ «...ամէն դէպքում՝ արժէքների թանձրացական կիրառութիւնը յաճախ մեծապէս կախուած է անձի իւրայատկութիւնից և կենսագրութիւնից, որոնք տարբերակում են միմեանցից գիտական խմբակի անդամներին»⁶⁰:

Առարկայական մատրիցայի չորրորդ տարրն ամենաէականն է, որովհետեւ Կունը գտնում է, որ սա կարելի էր անուանել հէնց «յարացոյց» (պարադիգմա). դա «...լեզուականօրէն և իմֆնակենսագրականօրէն տեղին կը լինէր: Սակայն քանի որ այս հասկացութիւնը, շարունակում է Թ. Շ. Կունը, արդէն ստացել է իր էութիւնը, ապա այն այստեղ կը փոխարինեմ «նմոյշ» բառով: Այս տեսակի տարրի ներքոյ ես հասկանում եմ, ամենից առաջ, խնդիրների թանձրացական լուծումներ, որոնց հետ բախում են ուսանողները՝ գիտական պատրաստութեան հէնց սկզբից՝ լաբարատորիաներում, ֆննութիւնների ժամանակ, կամ ուսումնական ձեռնարկների ...վերջում»: «Նմոյշների համակարգերի մէջն եղած տարբերութիւնը, առաւել քան միւս տեսակի տարրերը, որոնք բաղադրում են գիտակարգային մատրիցան, որոշակիացնում են գիտական գիտելիքի նուրբ կառուցուածքը: Օրինակ՝ բոլոր ֆիզիկոսները սկսում են միեւնոյն նմոյշներից...»⁶¹:

Ինչպէս տեսանք, ըստ Թ. Շ. Կունի, գիտութիւնն ընդհանրապէս, կամ մէկ մասնաւոր գիտակարգը միշտ շրջապատուած է արտագիտական մի շարք իրողութիւններով, որոնք կա՛մ նախորդում են գիտական տեսութեանը, կա՛մ՝ յաջորդում, կա՛մ՝ ուղեկցում, և կա՛մ էլ՝ բոլորը միասին: Այդ արտագիտական իրողութիւնները, որոնք մտնում են նշանային ընդհանրականների, մետաֆիզիկական յարացոյցի, արժէքի և կամ նմուշի հայեցակէտերի մէջ, կարող են լինել ռացիոնալ, զգայական, իռացիոնալ, բնազդային, գիտակցական, անգիտակցական, հայեցողական, կենցաղային, և այլն: Սրանց ցանկացած համադրական ամբողջը, իր հերթին, խմբային մակարդակում, միշտ ինչ-որ մշակոյթի և կամ ենթամշակոյթի ազդեցութեան տակ է, այդ թուում նաեւ՝ մոդայի: Անձի մակարդակում, այս ամենից զատ, առկայ են նաեւ խառնուածքի, բնաւորութեան, դաստիարակութեան և նեղ-անմիջական միջավայրի գործոնները, և այլն:

Քանի որ վերը բաւարար չափով յայտաձուեց գիտութեան և կրօնի էական յատկութիւնները, ապա կարելի է կատարել որոշակի համադրում-հարցադրումներ: Արդեօք գիտութիւնն ընդհանրապէս կարո՞ղ է բախուել կրօնի հետ, եթէ աշխարհի առաջնալը մէկանգամեայ պատահոյթ է, իսկ գիտութիւնը (ինչպէս վերը հիմնաւորւեց) ուսումնասիրում է «...աշխարհի իրերի և երեւոյթների անհրաժեշտ, կրկնող, կայուն

⁵⁷ Նոյն տեղում, էջ 237:

⁵⁸ Նոյն տեղում:

⁵⁹ Նոյն տեղում, էջ 238:

⁶⁰ Նոյն տեղում:

⁶¹ Նոյն տեղում, էջ 240:

կապերը, որոնք տեղի են ունենում անհրաժեշտաբար, համընդհանուր են, կրկնելի և ինվարիանտ»։ Ակնյայտ է՝ ո՛չ։

Գիտութեամբ զբաղուող անձը կարո՞ղ է արդեօք փնտրել և իր նախագիտական համակարգում կաղապարել գիտական որոշ տուեալներ, որոնք ճշմարտութեան միեւնոյն արժէքը կունենան, եթէ տուեալ գիտնականն ունենար լիովին հակադիր նախագիտական համակարգ։ Այո՛։

Ուրեմն գիտական տուեալը, մասնաւոր գիտակարգը, և գիտութիւնն ընդհանրապէս, սկզբունքօրէն չի կարող բախուել կրօնի հետ։ Կրօնի հետ բախում է գիտնականի՝ նախքան գիտութեան տրուածութիւնը՝ յարացոյցը, որը ծառայում է որպէս հիմք՝ մեկնաբանելու և կաղապարելու համար ամէն հնարաւոր գիտական տուեալ։ Ուրեմն գիտնականը իր կանխակալ մօտեցմամբ է, որ «կարողանում» է ստեղծել բախում գիտական տուեալի և կրօնական պնդման միջեւ, մի իրողութիւն, որ զուրկ է ամէն տեսակ տրամաբանական հիմքից։

Գիտութեան էութեան հիմնախնդիրներին միայն Թ. Շ. Կունը չէ, որ անդրադարձել է, սակայն այն նկատառումով, որով վերը քննարկուեց Կունի տեսութիւնը, մեր կատարած եզրակացութիւններին կը համաձայնեն նաեւ Կ. Պոպպերի, Պ. Ֆեյրբաքենդի, Ի. Լակատոշի, Լ. Լաուդանի, և այլ խոշոր էպիստեմոլոգների տեսութիւններն ունայէս։

Այսպիսով, կարելի է եզրակացնել, որ կրօն-գիտութիւն հակամարտային մոդելը, ռացիոնալ տեսանկիւնից, կեղծ է, իսկ կրօնական պնդման և գիտական տուեալի բոլոր տեսակի բախումները՝ ոչ լեգիտիմ։ Իսկ այն փաստը, որ ներկայումս բազմաթիւ բանավէճերում հնարաւոր է դառնում իրականացնել այս մտացածին բախումը, ծագում է նրանից, որ կամ կրօնին մօտենում են որպէս մասնաւոր գիտակարգի, կամ՝ գիտակարգին (գիտութեանը) մօտենում են որպէս կրօն, կամ էլ՝ երկուսը միասին։

Վերջապէս՝ և՛ այն գիտնականները, որոնք դրական կարծիք են յայտնել կրօնական ինչ-ինչ դրոյթների մասին, և՛ նրանք, որ հակադրուել են կրօնին, հիմնաւորւած, տրամաբանօրէն ճշգրիտ և անհրաժեշտաբար չէ, որ յանգել են եզրայանգմանը՝ ելակէտուելով իրենց նեղ-մասնագիտական գործունէութեան արդիւնքներից. նրանց կարծիքներն այս հարցում նոյնքան վաւերականութիւն ունեն, որքան ոչ մտաւորական գործունէութեամբ զբաղուող անձանց կարծիքները։

Ուստի աթեիստը, որը վկայակոչում է գիտութիւնը՝ հերքելու համար կրօնական ինչ-որ պնդում, թոյլ է տալիս տրամաբանական կոպիտ սխալ, և հէնց շեմից, հակասում ինքն իրեն։



Գ. ՅԱԿՈԲԵԱՆ

ԿՐՕՆԻ ԵՒ ԳԻՏՈՒԹԵԱՆ ՀԱԿԱՄԱՐՏՈՒԹԵԱՆ**ՀԻՄՆԱԽՆԴՐԻ ՇՈՒՐՋ***Ամփոփում*

Յօդուածում քննարկում է կրօնի և գիտութեան ռացիոնալ հակամարտութեան լեգիտիմութեան հարցը: Յայտաձեւով կրօնի և գիտութեան կառուցուածքային տարրերը, գտնում ենք, որ հոգեւոր մշակոյթի այս երկու ձեւերի հակամարտութիւնը մտաջաժին է և զուրկ ռացիոնալ հիմնաւորումից, հետեւաբար կրօն-գիտութիւն հակամարտային մոդելից արտածուող բոլոր խնդիրները, բանական տեսանկիւնից, կեղծ են:

G. HAKOBYAN

ON THE PROBLEM OF THE CONFLICT**BETWEEN RELIGION AND SCIENCE***Summary*

The article deals with the problem of the rational legitimacy of the conflict between religion and science. In exploring the structural elements of religion and science, we find that the conflict between these two forms of spiritual culture is fictitious and has no rational justification; therefore all the questions that are derived from the conflict of the religion-science model are false.